

Presidente di fundacion E Faro, sr. Rhyan Maduro

Falta di claridad ta ocasiona cu pashentnan cu HIV/ AIDS su derechonan humano ta ser viola

ORANJESTAD - E discriminacion ta e preocupacion mas grandi cu ta biba den e comunidad cu ta biba cu HIV/Aids na Aruba. Presidente di Fundacion.

E Faro cu ta un fundacion cu a bira un luz di sosten pa e personanan cu ta biba cu e virus di HIV/AIDS, ta kere cu un di e problemanan mas grandi no ta e condicion di e enfermedad pa motibo cu tin remedi y e ta algo cu por ser trata. Ademá e persona cu ta biba cu HIV, ta haya remedi ya cu nos sistema di AZV ta cubri e atencion di remedi aki.

Pesey e ta haya cu e problema mas grandi di e hendenan cu ta biba cu HIV/Aids aki na Aruba y den nos region, ta e stigma y discriminacion cu ta existi, y cu ta ser refleha den e bida diario di un persona cu e virus di

HIV. E ta bin di diferente forma, un di nan ta cu e hendenan cu ta bibando cu HIV na Aruba no tin derecho na un seguro di bida.

Esaki tin su consecuencia, ya cu un persona cu Aids cu tin e soño di compra un cas, e no por bira realidad su soño, ya cu e tin cu cera un seguro di bida pa compra e cas.

Tampoco e por compra un auto; y hasta e persona por perde su trabou, ya cu tin luganan di trabou cu ta pidi pa su empleado cera un seguro di bida como nan paquete di beneficio; y di otro banda e seguro di bida ta exige pa e cliente haci un test di HIV.

Sr. Maduro ta declara cu tin hopi violacion di derechonan humano, y esaki ta bin pa motibo cu no tin un claridad tocante kico realmente ta derechonan humano; y

cual ta e derechonan cu ta wordo viola di e pashentnan infecta pa e virus di HIV.

Presidente di e fundacion E Faro a haci ge-woon un comparacion entre un persona cu ta diabetico cu ta gosa di tur derecho, mientras cu esaki no ta e caso pa un pashent cu HIV. E persona diabetico por cera un seguro di bida, e por hiba un bida normal, e por biba habri cu su situacion di ta diabetico, pero un persona cu ta HIV no por...

Mientras cu na aña 2004, HIV a wordo clasifica como un malesa cronico, es decir e no ta un malesa mortal mas. Esey kieren cu un persona cu HIV tin acceso na medicina manera nos pais. Sr. Rhyan Maduro a laga sa cu e hendenan no ta muriendo di e virus di HIV ya cu e pashent no ta

yegando na e etapa di Aids.

Nos pais mes den ultimo 20 aña a raporta solamente 19 caso di personanan cu a fayece di Aids, y esaki tabata pa otro motibo, y no precisamente pa falta di remedi.

Sr. Maduro ta bisa cu e

panorama aki ta ilustra cu nos tin cu cambia e mentalidad tocante HIV. E ta haya cu HIV/Aids ta ser trata riba un topico, esta sex y sexualidad; y esey ta pone cu hopi hende no kier papia di dje. Y esey ta e problema principal na Aruba, segun e presidente di e fundacion E Faro. □